

重刊宋本論語
注疏附校勘記

嘉慶二十年江西南昌府學開雕

太子少保江西巡撫兼提督揚州阮元審定武寧縣貢生盧寬有校

欽定四庫全書總目論語正義二十卷

魏何晏注宋邢昺疏昺字叔明曹州濟陰人
太平興國中擢九經及第官至禮部尚書事
蹟具宋史本傳是書蓋咸平二年詔昺改定
舊疏頒列學官至今承用而傳刻頗譌集解
所引十三家今本各題曰某氏皇侃義疏則
均題其名案奏進序中稱集諸家之善記其
姓名侃疏亦曰何集注皆呼人名惟包獨言
氏者包名咸何家諱咸故不言也與序文合
知今本爲後來刊版之省文然周氏與周生

烈遂不可分殊不如皇本之有別考邢昺疏
中亦載皇侃何氏諱咸之語其疏記其姓名
句則云注但記其姓而此連言名者以著其
姓所以名其人非謂名字之名也是昺所見
之本已惟題姓故有是曲說七經孟子考文
稱其國皇侃義疏本爲唐代所傳是亦一證
矣其文與皇侃所載亦異同不一大抵互有
短長如學而篇不患人之不知章皇疏有
王肅注一條里仁篇君子之於天下也章皇
疏有何晏注一條今本皆無觀顧炎武石經

考以石經儀禮校監版或併經文全節漏落
則今本集解傳刻佚脫蓋所不免然蔡邕石
經論語於而在蕭牆之內句兩本竝存見於
隸釋陸德明經典釋文於諸本同異亦皆竝
存蓋唐以前經師授受各守專門雖經文亦
不能畫一無論注文固不必以此改彼亦不
必以彼改此今仍從今本錄之所以各存其
舊也曷疏宋志作十卷今本二十卷蓋後人
依論語篇第析之晁公武讀書志稱其亦因
皇侃所採諸儒之說刊定而成今觀其書大

抵翦皇氏之枝蔓而稍傳以義理漢學宋學
茲其轉關是疏出而皇疏微迨伊洛之說出
而是疏又微故中興書目曰其書於章句訓
詁名物之際詳矣蓋微言其未造精微也然
先有是疏而後講學諸儒得沿溯以窺其奧
祭先河而後海亦何可以後來居上遂盡廢
其功乎

論語注疏解經序

翰林侍講學士朝請大夫守國子祭酒上柱國賜紫金魚

袋臣邢昺等奉 勅校定

序解

〔疏〕

正義曰案漢書藝文志云論語者孔子應荅弟子時人

所記夫子既卒門人相與輯而論纂故謂之論語然則夫子既終微言已絕弟子恐離居已後各生異見而聖言永滅故相與論撰因採時賢及古明王之語合成一法謂之論語也鄭立云仲弓子游子夏等撰定論者綸也輪也理也次也撰也以此書可以經綸世務故曰綸也圓轉無窮故曰輪也蘊含萬理故曰理也篇章有序故曰次也羣賢集定故曰撰也鄭立周禮注云荅述曰語以此書所載皆仲尼應荅弟子及時人之辭故曰語而在論下者必經論撰然後載之以示非妄謬也以其口相傳授故經焚書而獨存也漢興傳者則有三家魯論語者魯人所傳即今所行篇次是也常山都尉龔

奮長信少府夏侯勝丞相韋賢及子立成魯扶卿太子太傅
夏侯建前將軍蕭望之並傳之各自名家齊論者齊人所傳
別有問王知道二篇凡二十一篇其二十篇中章句頗多於
魯論昌邑中尉王吉少府朱畸琅邪王卿御史大夫貢禹尚
書令五鹿充宗膠東庸生並傳之唯王吉名家古論語者出
自孔氏壁中凡二十一篇有兩子張篇次不與齊魯論同孔
安國爲傳後漢馬融亦注之安昌侯張禹受魯論于夏侯建
又從庸生王吉受齊論擇善而從號曰張侯論最後而行於
漢世禹以論授成帝後漢包咸周氏並爲章句列於學官鄭
玄就魯論張包周之篇章考之齊古爲之注焉魏吏部尚書
何晏集孔安國包咸周氏馬融鄭玄陳羣王肅周生烈之說
并下已意爲集解正始中上之盛行於世今以爲主焉序者
何晏次序傳授誦說之人乃已集解
之意序爲論語而作故曰論語序

敘曰漢中壘校尉劉向言魯論語二十篇皆孔子

弟子記諸善言也大子大傅夏侯勝前將軍

蕭望之丞相韋賢及子立成等傳之疏敘曰至
傳之

正義曰此敘魯論之作及傳授之人也敘與序音義同曰者發語辭也案漢書百官公卿表云中壘校尉掌北軍壘門內外掌西域顏師古曰掌北軍壘門之內而又外掌西域劉向者高祖少弟楚元王之後辟彊之孫德之子字子政本名更生成帝卽位更名向數上疏言得失以向爲中壘校尉向爲人簡易專精思於經術成帝詔校經傳諸子詩賦每一書已向輒條其篇目撮其指意錄而奏之著別錄新序此言魯論語二十篇皆孔子弟子記諸善言也蓋出於彼故何晏引之對文則直言曰言荅述曰語散則言語可通故此論夫子之語而謂之善言也表又云太子太傅古官秩二千石傳云夏侯勝字長公東平人少好學爲學精熟善說禮服徵爲博士宣帝立太后省政勝以尚書授太后遷長信少府坐議廟樂事下獄繫再更冬會赦出爲諫大夫上知勝素直復爲長信少府遷太子太傅受詔撰尚書論語說賜黃金百斤年九十卒官賜冢塋葬平陵太后賜錢三百萬爲勝素服五日以報師傅之恩儒者以爲榮始勝每講授常謂諸生日士病不明經術經術苟明其取青紫如俛拾地芥耳學經不明不如親耕表又云前後左右將軍皆周末官秦因之位上卿金印紫綬漢不常置或有前後或有左右皆掌兵及四夷傳云蕭望之字長倩東海蘭陵人也好學齊詩事同縣后倉又從夏侯

勝論語禮服以射策甲科為郎累遷諫大夫後代丙吉為御史大夫左遷為太子太傅及宣帝寢疾選大臣可屬者引至禁中拜望之為前將軍元帝即位為弘恭石顯等所害飲鴆自殺天子聞之驚拊手為之卻食涕泣哀勵左右子伋嗣為關內侯表又云相國丞相皆秦官金印紫綬掌天子助理萬機應劭曰丞承也相助也秦有左右高帝即位置一丞相十一年更名相國綠綬孝惠高后置左右丞相文帝二年一丞相哀帝元壽二年更名大司徒傳曰韋賢字長孺魯國鄒人也賢為人質朴少欲篤志於學兼通禮尚書以詩教授號稱鄒魯大儒徵為博士給事中進授昭帝詩稍遷光祿大夫及宣帝即位以先帝師甚見尊重本始三年代蔡義為丞相封扶陽侯年七十餘為相五歲地節三年以老病乞骸骨賜黃金百斤罷歸加賜第一區丞相致仕自賢始年八十二薨諡曰節侯少子立成字少翁復以明經歷位至丞相鄒魯諺曰遺子黃金滿籬不如一經立成為相七年建昭三年薨諡曰共侯此四人皆傳魯論語

齊論語二

十二篇其二十篇中章句頗多於魯論琅邪王

卿及膠東唐生昌邑中尉王吉皆以教授疏齊

至教授。正義曰：此敘齊論語之興及傳授之人也。齊論語凡二十二篇，其二十篇篇名與魯論正同，其篇中章句則頗多於魯論。篇者，積章而成篇，編也。言出情鋪事明而編者也。積句以成章，章者明也。揔義包體，所以明情者也。句必聯字而言，句者局也。聯字分疆，所以局言者也。琅邪膠東郡國名，王卿天漢元年由濟南太守為御史大夫，庸生名譚生，蓋古謂有德者也。昌邑中尉者，表云諸侯王高帝初置金璽蓋綬掌治其國，有太傅輔王內史治國民中尉掌武職丞相統衆官。景帝中五年改丞相曰相，成帝綏和元年省內史更名相治民如郡太守。中尉如郡都尉，傳云王吉字子陽，琅邪阜康人也。少好學，明經以郡吏舉孝廉為郎，補若盧右丞，遷熒陽令，舉賢良為昌邑中尉。此三人皆以齊論語教授於人也。

故有魯論有齊論疏。故有魯論有齊論。正義曰：既敘魯論齊論之作及傳述之人，乃以此言結之也。

魯共王時嘗欲以孔子宅為宮，壞得古

文論語疏

魯共王時嘗欲以孔子宅為宮，乃毀之於壁中，故得此古文論語也。傳曰：魯共王餘

景帝子程姬所生，以孝景前二年立為淮陽王，前三年徙王

魯二十八年薨諡曰共王初好治宮室壞孔子舊宅以廣其宮聞鍾磬琴瑟之音遂不敢復壞於其壁中得古文經傳卽謂此論語及孝經爲傳也故漢武帝謂東方朔云傳曰時然後言人不厭其言又成帝賜翟方進策書云傳曰高而不危所以長守貴也是漢世通謂論語孝經爲傳以論語孝經非先王之書是孔子所傳說故謂之傳所以異於先王之書也言古文者科斗書也所謂倉頡本體周所用之以今所不識是古人所爲故名古文形多頭麤尾細狀復團圓似水蟲之科斗故曰

齊論有問王知道多於魯論二篇古論

亦無此二篇分堯曰下章子張問以爲一篇有

兩子張凡二十一篇篇次不與齊魯論同疏

齊論

至魯論同正義曰此辨三論篇章之異也齊論有問王知道多於魯論二篇所謂齊論語一十二篇也古論亦無此問王知道二篇非但魯論無之古論亦無也古論亦無此二篇而分堯曰下章子張問以爲一篇有兩子張凡二十一篇如淳曰分堯曰篇後子張問何如可以從政以下爲篇名曰安從政其篇次又不與齊魯論同新論云文異者四百餘字

昌侯張禹本受魯論兼講齊說善者從之號曰

張侯論爲世所貴包氏周氏章句出焉疏

安昌侯至

出焉。正義曰此言張禹擇齊魯論之善者從之爲世所重包周二氏爲章句訓說此張侯論語也傳曰張禹字子文河內軹人也從沛郡施讐受易王陽庸生問論語既皆明習舉爲郡文學久之試爲博士初元中立皇太子令禹授太子論語由是遷光祿大夫數歲出爲東平內史成帝卽位徵禹以師賜爵關內侯給事中領尚書事河平四年代王商爲丞相封安昌侯爲相六歲乞骸就第建平二年薨諡曰節侯禹本受魯論於夏侯建又從庸生王吉受齊論故兼講齊說也傳又云始魯扶卿及夏侯勝王陽蕭望之韋玄成皆說論語篇第或異禹先事王陽後從庸生采獲所安最後出而尊貴諸儒爲之語曰欲不爲論念張文由是學者多從張氏餘家浸微是其善者從之號曰張侯論爲世所貴之事後漢儒林傳云包咸字子良會稽曲阿人也少爲諸生昌魯詩論語舉孝廉除郎中建武中入授皇太子論語又爲其章句拜諫議大夫永平五年遷大鴻臚周氏不詳何人章句者訓解科段之名包氏周氏就張侯論爲之章句訓解以出其義理焉不言

名而言氏者蓋爲章句之時義在謙退不欲顯題其名但欲傳之私族故直云氏而已若杜元凱集解春秋謂之杜氏也或曰以何氏諱咸故沒其名但言包氏連言周氏耳古論唯博士孔安國爲之

訓解而世不傳至順帝時南郡太守馬融亦爲

之訓說

疏古論至訓說正義曰此敘訓說古文論語之

人也史記世家安國孔子十一世孫爲武帝博士時魯共王壞孔子舊宅壁中得古文虞夏商周之書及傳論語孝經悉還孔氏故安國承詔作書傳又作古文孝經傳亦作論語訓解釋詁云訓道也然則道其義釋其理謂之訓解以傳述言之曰傳以釋理言之曰訓解其實一也以武帝末年遭巫蠱事經籍道息故世不傳自此安國之後至後漢順帝時有南郡太守馬融亦爲古文論語訓說案後漢紀孝順皇帝諱保安帝之子也地理志云南郡秦置高帝元年更爲臨江郡五年復故景帝二年復爲臨江郡中二年復故屬荆州表云郡守秦官掌治其郡秩二千石景帝中二年更名太守傳云馬融字季長扶風茂陵人也爲人美辭貌有俊才博通經籍永初中爲校書郎陽嘉二年拜議郎梁商表爲從事中郎轉武鄉太守三遷爲南郡太守注孝經論語詩易尚

書三禮年八十八
延壽九年卒於家
漢末大司農鄭玄就魯論篇章

考之齊古為之註疏
漢末至之註正義曰言鄭玄亦為論語之注也鄭玄字康成北海

高密縣人師事馬融大司農徵不起居家教授當後漢桓靈
時故云漢末注易尚書三禮論語尚書大傳五經緯候箋毛
詩作毛詩譜破許慎五經異義針何休左氏膏肓發公羊墨
守起穀梁廢疾可謂大儒作注之時就魯論篇章謂二十篇
也復考校之以齊論古論擇其善者而為之註註與注音義同
近故司空陳羣太常

王肅博士周生烈皆為義說疏
近故至義說正義曰此敘魏時注說論

語之人也年世未遠人已歿故是近故也司空古官三公也
表云奉常秦官掌宗廟禮儀景帝中六年更名太常博士秦
官掌通古今魏志云陳羣字長文潁川許昌人也太祖辟羣
為司空西曹屬文帝即位遷尚書僕射明帝即位進封潁陰
侯項之為司空青龍四年薨王肅字子邕東海蘭陵人魏衛
將軍太常蘭陵景侯甘露元年薨注尚書禮喪服論語孔子
家語述毛詩注作聖證論難鄭玄周生烈燉煌人七錄云字
文逸本姓唐魏博士侍中此二人皆為論語義說謂作注而

說其義故云義說

前世傳授師說雖有異同不爲訓解中

間爲之訓解至于今多矣所見不同互有得失

疏前世至得失。正義曰將作論語集解故須言先儒有得失不同之說也據今而道往古謂之前世上教下曰傳下

承上曰受謂張禹以上至夏侯勝以來但師資誦說而已雖說有異者同者皆不著篇簡以爲傳注訓解中間爲之訓解

謂自古至今中間包氏周氏等爲此論語訓解有二十餘家故云至于今多矣以其趣舍各異故得失互有也

集諸家之善記其姓名有不安者頗爲改易名

曰論語集解疏。今集至集解。正義曰此敘集解之體例也今謂何晏時諸家謂孔安國包咸

周氏馬融鄭玄陳羣王肅周生烈也集此諸家所說善者而存之示無勦說故各記其姓名注言包曰馬曰之類是也注

但記其姓而此連言名者以著其姓所以名其人非謂名字之名也有不安者謂諸家之說於義有不安者也頗爲改易

者言諸家之善則存而不改其不善者頗多爲改易之注首不言包曰馬曰及諸家說下言一曰者皆是何氏自下已言